

Broj:  
Datum,

Na osnovu člana 13. Zakona o principima lokalne samouprave u Federaciji Bosne i Hercegovine ("Službene novine Federacije BiH", broj: 49/06 i 51/09) i člana 18. Statuta Općine Maglaj ("Službene novine Općine Maglaj", broj:8/07; 3/08 i 6/08), Općinsko vijeće Maglaj na sjednici održanoj dana \_\_\_\_\_, donosi

**ODLUKU**  
**o obilježavanju ulica i trgova imenima i zgrada brojevima**

**I OPĆE ODREDBE**

Član 1.

Ovom Odlukom uređuje se način obilježavanja naseljenih mjesta, ulica i trgova imenima i zgrada brojevima, vođenje registra ulica, trgova i oznaka zgrada na području općine Maglaj.

Član 2.

Naseljena mjesta, ulice i trgovi moraju biti označeni natpisnim pločama sa njihovim imenom u skladu sa Odlukom o granicama naseljenih mjesta na području općine Maglaj i Odlukom o izmjeni dosadašnjih i utvrđivanju novih naziva ulica u gradskom području Maglaja.

Tabla sa imenima naseljenih mjesta , ulica, trgova, mostova i table kućnih brojeva i njihove dodatne table izrađuju se od trajnog materijala.

Dvije ili više zgrada u istoj ulici ili naselju ne mogu se označavati istim brojem.

**II OBILJEŽAVANJE IMENA NASELJENIH MJESTA, ULICA, TRGOVA I MOSTOVA**

Član 3.

Imena naseljenih mjesta, ulica, trgova i mostova obilježavaju se tablama veličine cca 50 x 30 cm.

Član 4.

Table sa imenima naseljenih mjesta, ulica, trgova i mostova postavljaju se na prilaznim i izlaznim putevima za naseljeno mjesto i to sa desne strane oznakom naseljenog mjesta odnosno prestanka teritorije naseljenog mjesta.

Table sa imenima ulica postavljaju se na zgrade ili zidove na početku ulice s desne strane i na kraju ulice sa lijeve strane i po potrebi na svakoj raskrsnici.

Table sa imenima trgova i mostova postavljaju se na njihovim prilazima.

Table iz stava 1., 2. i 3. ovog člana postavljaju se na lako uočljivim mjestima na visini od najmanje 2,5 metra.

Ako na početku ili na kraju ulice odnosno na prilazu trgu nema zgrade niti zida na koji bi se tabla mogla postaviti na propisanu visinu, tabla se postavlja na drugi prikladan način.

### III OBILJEŽAVANJE ZGRADA BROJEVIMA

#### Član 5.

Određivanje brojeva zgrada na području općine Maglaj vrši nadležna služba Općine Maglaj, u evidenciji adresnog registra.

Kućnim brojevima označavaju se zgrade individualnog i kolektivnog stanovanja i samostalni privredni i poslovni objekti.

Kućnim brojevima ne označavaju se kuće za odmor, pomoćni objekti ni garaže.

Poslovni prostori u zgradama kolektivnog stanovanja koriste kućni broj najbližeg ulaza u zgradu.

Zgrade na području općine Maglaj označavaju se tablicama veličine cca 15 x 20 cm, na podlozi plave boje slovima bijele boje. Table kućnog broja sadržavaju kućni broj, slovnu oznaku ukoliko je potrebna i ime ulice/trga ili naselja. Table sa kućnim brojevima postavljaju se sa desne strane ulaza u zgradu na visini cca 2 metra.

#### Član 6.

Zgrade sa dva ili više ulaza obilježavaju se zasebnim brojem za svaki ulaz.

#### Član 7.

Slovna oznaka ispisuje se na tablici kućnog broja a izuzetno se može ispisivati i na dodatnoj tabli veličine 5x 15 cm koja se pričvršćuje na desnoj strani table sa kućnim brojem.

Dodatna tabla iz prethodnog stava izrađuje se od istog materijala i u istoj boji kao i table kućnog broja.

#### Član 8.

Ako bi označavanje novoizgrađene zgrade posebnim brojem izazvalo promjene kućnih brojeva na ranije izgrađenim zgradama u istoj ulici ili naselju, novoizgrađena zgrada će se označiti brojem prve susjedne zgrade koja ima manji broj i dodatkom slovne oznake.

#### Član 9.

Označavanje zgrada kućnim brojevima u ulicama i naseljima započinje s one strane ulice koja je bliža glavnoj saobraćajnici, i definisana je linijom ulice u evidenciji adresnog registra.

#### Član 10.

Označavanje zgrada kućnim brojevima u ulicama vrši se tako da zgrade s lijeve strane dobiju neparne brojeve počev od broja 1 a zgrade s desne strane ulice dobivaju parne brojeve počev od broja 2.

#### Član 11.

Označavanje zgrada kućnim brojevima u ulicama i naseljima gdje nije moguće primjeniti pravilo iz prethodnog člana, vrši se onim redom koji je najpogodniji za najkraći i najprirodniji prilaz od zgrade do zgrade.

#### Član 12.

Poslove nabavke i postavljanje tabli s imenima naselja, ulica i trgova te tabli sa kućnim brojevima vrši pravno lice kojeg Općina Maglaj odabere u skladu sa Zakonom o javnim nabavkama.

#### Član 13.

Fizička i pravna lica kao i vlasnici zgrada dužni su da nadležnom općinskom organu, odnosno odabranom pravnom licu, omogućе postavljanje tabli sa kućnim brojem i imenima ulica i trgova ako se table sa imenima ulica i trgova trebaju nalaziti na njihovim zgradama.

#### Član 14.

Zabranjeno je neovlašteno postavljanje, skidanje, uništavanje ili premještanje tabli sa imenima ulica, trgova i kućnih brojeva.

#### Član 15.

Investitori i vlasnici novih zgrada, porodičnih kuća, privrednih i poslovnih objekata dužni su u roku od dva mjeseca od početka korištenja pomenutih objekata da pismeno podnesu zahtjev nadležnoj općinskoj službi za određivanje kućnog broja.

#### Član 16.

U slučajevima popravke fasade zgrade ili postavljanja nove fasade na zgradi, izvođači radova dužni su po završetku radova table sa imenima ulica, trgova i kućnih brojeva dovesti u prvobitno stanje.

#### Član 17.

Vlasnici zgrada, fizička i pravna lica koja upravljaju zgradama dužni su da prije nego započnu sa rušenjem zgrade o tome pismeno obavijestiti nadležnu općinsku službu sa naznakom ulice i kućnog broja zgrade koju namjeravaju rušiti.

## Član 18.

O naseljima, ulicama i kućnim brojevima na zgradama na području općine Maglaj vodi se adresni registar.

Adresni registar iz prethodnog stava vodi nadležna općinska služba.

## IV NADZOR

### Član 19.

Nadzor u primjeni odredaba ove Odluke vrši urbanističko-građevinski inspektor.

## V KAZNENE ODREDBE

### Član 20.

Novčanom kaznom od 200 do 500 KM kazniće se pravno lice:

1. koje onemogućí postavljanje tabli s imenima ulica i tabli sa kućnim brojevima (član 14.)
2. koje neovlašteno postavlja, skida ili premješta table sa imenima ulica ili kućnih brojeva (član 15.)
3. koje u roku ne podnese zahtjev nadležnom organu za označavanje zgrade kućnim brojem (član 16.)
4. koje poslije izvođenja radova na zgradi ostavi table sa imenom ulice ili kućnog broja u neispravnom stanju (član 17.)
5. koje u roku ne obavjesti nadležni organ o rušenju zgrade (član 18.).

Za prekršaj iz stava 1. ovog člana novčanom kaznom u iznosu 100 do 300 KM kaznit će se odgovorno lice u pravnom licu.

### Član 21.

Novčanom kaznom od 50 do 200 KM kaznit će se fizičko lice za prekršaj:

1. ako onemogućí postavljanje tabli s imenima ulica i tabli sa kućnim brojevima (član 14.)
2. ako neovlašteno postavlja, skida ili premješta table sa imenima ulica ili kućnih brojeva (član 15.)
3. ako u roku ne podnese zahtjev nadležnom organu za označavanje zgrade kućnim brojem (član 16.)
4. ako poslije izvođenja radova na fasadama ne dovede table sa imenima ulica i kućnim brojevima u ispravno stanje (član 17.)
5. ako u roku ne obavijesti nadležni organ o rušenju zgrade (član 18.)

## VI PRELAZNE I ZAVRŠNE ODREDBE

### Član 22.

Ova Odluka stupa na snagu osmog dana od dana objavljivanja u „Službenim novinama Općine Maglaj“.

Predsjedavajuća Općinskog vijeća  
Svjetlana Zamboni

**O b r a z l o ž e n j e**  
uz Prijedlog Odluke o obilježavanju ulica i trgova imenima i zgrada brojevima

U doba satelitske navigacije suvišno je objašnjavati potrebu za uvođenjem evidencije adresnog registra, odnosno obilježavanja ulica imenima i zgrada kućnim brojevima, a naročita potreba za ovakvim obilježavanjem postoji u slučajevima intervencija hitnih službi (hitne medicinske pomoći, vatrogasne službe, policije) i sl.

Stoga i Općina Maglaj pristupa projektu izrade adresnog registra, uz velikodušnu pomoć Federalne uprave za geodetske i imovinsko-pravne poslove, koja je donirala software i njegovo održavanje. Potrebno je napomenuti da je prema podacima posljednjeg popisa stanovništva tek oko 5% objekata imalo kućni broj.

Stoga se pristupilo izradi evidencije adresnog registra.

Spisak naseljenih mjesta na području općine Maglaj preuzet je iz podataka Federalnog zavoda za statistiku.

Granice naseljenih mjesta uglavnom odgovaraju granicama katastarskih općina, osim u:

- područje katastarske općine Maglaj pokriva naseljena mjesta Maglaj, Bijela Ploča, Misurići i Parnica
- područje katastarske općine Ulišnjak pokriva naseljena mjesta Gornji i Donji Ulišnjak
- područje katastarske općine Bradići pokriva naseljena mjesta Gornji i Donji Bradići

Ukazala se potreba manjih izmjena granica naseljenih mjesta: npr. granica između naseljenih mjesta Maglaj i Bijela Ploča prolazila je putem za Plane te bi bilo nelogično da objekti s jedne strane ulice pripadaju naseljenom mjestu Maglaj a s druge strane Bijeloj Ploči.

Izvršena je analiza dosadašnjeg stanja kućnih brojeva i iz katastarske evidencije preuzeti su kućni brojevi upisane u popisne liste prilikom uspostave novog katastarskog operata, koji je stupio na snagu 01.01.1974. godine.

Analizom je utvrđeno da se u naseljenim mjestima Maglaj i Novi Šeher mogu zadržati dosadašnji kućni brojevi, te su preuzeti i dosadašnji nazivi ulica. Što se tiče naseljenog mjesta Maglaj, ukazala se potreba da tri nove ulice koje su izgrađene ili su u procesu izgradnje dobiju nova imena. U adresnom registru označene su kao Nova ulica I, II i III.

U naseljenom mjestu Misurići primjenjena je kombinovana metoda numeracije: otprije su postojale ulice s nazivima Bunarska, Misurićka, Tešanjaska i Željeznička, te su objekti u njima numerisani prema principima za numerisanje u ulicama, a ostali dio naseljenog mjesta numerisan je kao naselje. Analizom stanja u ostalim naseljenim mjestima konstatovano je da je zbog velikog broja novoizgrađenih objekata besmisleno zadržavati dosadašnje kućne brojeve, ali su software pruža mogućnost čuvanja dosadašnjih kućnih brojeva u arhivi. Stoga je za ta naseljena mjesta izrađena potpuno nova numeracija.

Obradivač: Đenana Bosnić dipl. ing. geod.

Kontrolor: Nedžad Čarić, pomoćnik načelnika Općine po ovlaštenju

DOSTAVLJENO:

1. Naslovu
2. Načelnik Općine
3. U spis



NAČELNIK OPĆINE  
Mirsad Mahmutagić